



Mungu Anakimu Mahitaji

Yetu

Msisumbukie maisha yenu, mle nini au mnywe nini; wala miili yenu, mvae nini. Maisha je! Si zaidi ya chakula, na mwili zaidi ya mavazi?—
Mathayo 6:25.

Yeye aliyekupa maisha anajua mahitaji yako ya chakula ili kuyaendeleza. Yeye aliyeumba mwili huo anazingatia mahitaji yako ya mavazi. Je, yule aliyetoa zawadi kubwa hatatoa pia kile kinachohitajika kukikamilisha?

Bwana Yesu alielekeza wasikilizaji Wake kwa ndege waliokuwa wakiimba nyimbo zao za sifa, bila kuwa na mawazo ya wasiwasi, kwa sababu "hawapandi, wala hawavuni"; licha ya hivyo Baba mkuu huwapatia mahitaji yao. Kisha Anauliza, "Je, ninyi hamna thamani kubwa zaidi kuliko wao?"

"Hakuna shomoro anayedondoka bila Yeye kujali,
 Hakuna roho inayoshuka bila ya Yesu kujua;
 Kwani Yeye yupo pamoja nasi kila mahali,
 Na anatambua kila chozi la uchungu linalotiririka.
 Na Yeye kamwe, kamwe, kamwe
 Hataacha roho inayo mtegemea milele."

Sheria ya Mungu ni sheria ya upendo. Amekuzingira kwa uzuri ili kukufundisha kuwa hujawekwa duniani ili kujitafutia mwenyewe tu, kuchimba na kujenga, kufanya kazi na kuzunguka, bali kufanya maisha kuwa na mwangaza, furaha na uzuri kwa upendo wa Kristo—kama vile maua, ili kufurahisha maisha mengine kwa huduma ya upendo.

Baba na mama, waacheni watoto wenu wajifunze kwenye maua. Wapelekeni pamoja nanyi kwenye bustani, shambani na chini ya miti yenye majani na mkawafundishe kusoma katika viumbe asili ujumbe wa upendo wa Mungu. Hebu ruhusu mawazo ya Mungu yawe na uhusiano na ndege, maua na miti. Waongoze watoto kuona katika kila kitu kilicho chema na kizuri, kauli ya upendo wa Mungu kwao. Pendekeza dini yako kwao kwa uzuri wake. Ruhusu sheria ya wema iwe kinywani mwako.

Fundisha watoto kwamba kwa sababu ya upendo mkuu wa Mungu, tabia zao zinaweza kubadilishwa na kuletwa katika upatanifu na tabia Yake. Wafundishe kwamba anataka maisha yawe na uzuri kama wa maua. Wafundishe, wanapokusanya maua mazuri, kwamba Yeye aliyeumba maua ni mzuri zaidi kuliko hayo. Kwa hivyo nyuzi za mioyo yao zitajifunga Kwake. Yeye ambaye ni "mzuri pia pia" atakuwa kwao kama mwenzi wa kila siku na rafiki wa karibu, na maisha yao yatabadilishwa kuwa mfano wa usafi Wake (Thoughts from the Mount of Blessing, 95-98).

(Mungu) anapenda kupamba tabia zetu kwa uzuri Wake mwingi. Anaweza kufanya maneno yetu kuwa na harufu nzuri kama maua ya shambani (The Review and Herald, Mei 19, 1896).